

**LISTOVI...**

GRAČANIČKI GLASNIK  
časopis za kulturnu  
historiju

Broj 44, godina XXII  
novembar, 2017. [str. 173-  
188]

© Monos 2017

# Listovi gračaničkog kalendara od aprila do novembra 2017.

(priredili: Omer Hamzić i Edin  
Šaković)

**27. 4. 2017.**

## **Održana 7. sjednica Općinskog vijeća: Odluka o proglašenju Gračanice gradom (nacrt)**

Osim nacrta navedene odluke i godišnjih izvještaja o radu i finansijskom poslovanju javnih zdravstvenih ustanova Doma zdravlja i Gradske apoteke, te Veterinarske stanice u Gračanici (sa bilansom stanja i uspjeha u 2016. godini), usvojen je i Izvještaj o izvršenju Budžeta Općine Gračanica za period 1. 1. – 31. 3. 2017. godine, te Odluka o ovogodišnjim općinskim priznanjima (u nacrtu). Iz usvojenog izvještaja o realizaciji Budžeta za navedeni period navodimo samo nekoliko bitnih podataka, na koje se osvrnuo i načelnik Nusret Helić u svom obrazloženju, rekavši da su u navedenom periodu ostvareni prihodi i primitci u iznosu od 3.129.690 KM, što je za oko 12 % više u odnosu na plan, ali u odnosu na isti period prošle godine manji za 7,7 %. Porezni prihodi su ostvareni u iznosu od 1.862.362 KM, što čini 59,52 % ukupnih prihoda i za 9,97 % su veći u odnosu na plan. U strukturi poreznih prihoda, najveći dio čine prihodi po osnovu indirektnih poreza. Porez na dohodak je bio veći u odnosu na plan za 12,21 %, dok su prihodi po osnovu PDV-a ostvareni u iznosu od 1.031.059 KM i manji su za 8,57 % u odnosu na očekivanja po planu Budžeta. Vezano za podbačaje prihoda iz PDV, izražena je zabrinutost i bojazan da bi se evidentni poremećaji u pogledu izmirenja prispjelih obaveza po osnovu zaduženja države i Federacije mogli ponovo prelomiti “preko leđa” općina, što bi se negativno odrazilo na realizaciju bitnih ciljeva Općine u 2017. godini.

**LISTOVI...**

**6. 5. 2017.**  
**Održan 20. Festival dječijeg teatra BiH: pobjednička predstava “Patuljkova nevolja” Katoličkog školskog centra “Sveti Franjo” Tuzla**



Organizatori festivala su i ove godine bili Centar za dramski odgoj iz Mostara i Bosanski kulturni centar Gračanica, kao domaćin. Na pozornici gračaničkog BKC-a nastupilo je 7 ekipa sa 90 učesnika iz svih dijelova BiH. Nastupe ekipa pratio je Stručni žiri u sastavu: mr. sc Ivana Milosavljević (slobodan umjetnik, Tuzla), prof. dr Jasmina Čelebić Tanović (Akademija dramskih umjetnosti u Tuzli) i Albina Sumbić (nastavnica, Gračanica). Nakon „odgledanih“ svih sedam predstava, žiri je dodijelio sljedeće nagrade i priznanja: *Pohvalu za odabir i istraživanje aktuelne teme današnjice* OŠ Donja Orahovica, Gračanica i predstavi „Novogodišnja predstava“, *Pohvalu za umjetničko-pedagoško vodstvo* Jasmini Hadžić, voditelju predstave „Jazavac pred sudom“ OŠ Humci – Humci, *Nagradu za scenski govor* Dramskoj grupi Sedme OŠ Blaževo Ilidža u predstavi „Kraljevski festival“, *Nagradu za primjenu novih teatarskih formi u teatru za djecu i interakciju s publikom* Mostarskom teatru mladih i predstavi „Ježeva kuća“, *Nagradu za najbolji kostim* – JU Prva osnovna škola Srebrenik i predstavi „Kad se bajke sretnu“, *Nagradu za kreaciju lika* za ulogu Cuge, učeniku Emrah Paro u predstavi „Kraljevski festival, Dramske grupe Sedme OŠ Blaževo, Ilidža, *Nagrada za predstavu u*

*čjelini* pripala je JU Katolički školski centar „Sv. Franjo“ i predstavi „Patuljkova nevolja“.

**12. 5. 2017.**  
**Općina Gračanica postaje grad: javna rasprava o Nacrtu odluke o proglašenju grada**

...nije privukla pažnju ni predstavnika vlasti, ni predstavnika političkih, a ni građanskih udruga, niti samih građana. Na pitanje da li se nešto suštinski mijenja u lokalnoj samoupravi nakon proglašenja Gračanice gradom, prema odgovorima predlagača – jedino dolazi do promjene samog naziva, a sve ostalo ostaje isto: grad ima jednaka prava kao i općina, jednake teritorijalne i administrativne granice. Otuda vjerovatno i slab interes lokalne javnosti. Nasuprot tome, predstavnici lokalne vlasti očekuju da bi bi status grada mogao dati određene prednosti prilikom kandidovanja projekata prema međunarodnim donatorima, ali najveća prednost bi bila prilikom stvaranja partnerskih odnosa s gradovima u inostranstvu.

**14. 5. 2017.**  
**Vodosnabdijevanje na općini Gračanica: nove količine vode za Prijeko Brdo**

Nakon izgradnje gradskog kolektora u Gračanici, nastavljani su radovi na istražnim bušotinama za nove količine vode, kako je planirano, na šest lokacija u naseljima: Malešići, Lukavica, Prijeko Brdo i Škahovica, te dvije na području MZ Lohinja (mikrolokacije Bje-livode i Keže). Već se pokazuje da su početni rezultati na istražnoj bušotini Prijeko Brdo ohrabrujući. Došlo se do 6 litara u sekundi, što će zadovoljiti potrebe tog sela za vodom u dužem periodu. Radovi se izvode u okviru realizacije međunarodnog projekta WAT-SANFBiH, putem kojeg će se samo na općini Gračanica uložiti oko 6 miliona KM.

**15. 5. 2017.**

**Firma “Mistral Technologies” iz Sarajeva, vlasništvo Gračanlije Mersedaa Čamdžića, na trećem mjestu najpoželjnijih poslodavaca u BiH**

Ceremonija dodjele priznanja “Najpoželjniji poslodavac” organizira se svake godine i jedan je od najvažnijih događaja u poslovnom okruženju BiH. Najpoželjnijeg poslodavca biraju korisnici portala *Posao.ba*, vodećeg web portala za zapošljavanje i jednog od najposjećenijih web portala u BiH. Manifestacija svake godine okuplja preko 100 vlasnika i direktora kompanija, PR i marketing menadžera, te najvažnije predstavnike političkog i privrednog života u BiH. Ove godine, jedanaesta po redu, Manifestacija je održana u hotelu Hills u Sarajevu. Drugu godinu zaredom najpoželjniji poslodavac u BiH je kompanija DM “Drogerie Markt”, na drugom mjestu je “Al Jazeera” dok je treća firma “Mistral Technologies” Sarajevo, u vlasništvu Gračanlije, Mersedaa Čamdžića, koja djeluje u oblasti informacionih tehnologija. Tajna uspjeha je u kvalitetu domaće pameti, angažovanju mladih i kreativnih ljudi, koji nalaze zaposlenje u firmi. U prošloj, 2016. godini u “Mistralu” je bilo u zaposleno oko 50 pretežno mladih inženjera, u ovoj ih je već stotinu, sa tendencijom daljeg porasta.

**18. 5. 2017.**

**Svečano otvoren proizvodno-logistički objekat firme “RPC Superfos” u Gračanici**

Pored regionalnog direktora “RPC Superfos” Jugoistočne Evrope Jeana Scandella, glavnog izvršnog direktora “RPC Superfos” Renea Valentina, te direktora “RPC Superfos Balkan” Suada Helića, svečanosti su prisustvovali i predstavnici ambasade Velike Britanije, općine Gračanica, te drugi gosti. Investicija je realizovana svega dvije godine nakon dolaska RPC-a u BiH. Proizvodni kapaciteti

firme u Gračanici prošireni su za 8.000 m<sup>2</sup>, što je dvostruko više u odnosu na dosadašnje stanje. Kako je tom prilikom istaknuo direktor Suad Helić, ovim proširenjem i adaptacijom omogućen je optimalniji rad uposlenicima kompanije, smanjen je rizik od poplava (s obzirom na blizinu Spreče), osigurano je bolje snabdijevanje kupaca, te stvorene pretpostavke za dodatni rast i razvoj – uz otvaranje novih radnih mjesta.

**20. 5. 2017.**

**U industrijskoj zoni svečano položen kamen-temelj za izgradnju fabrike čeličnih dijelova za automobilsku industriju i robotiku.**

Planirana je izgradnja proizvodne hale površine 4.000 m<sup>2</sup> kompanije “HST CNC technik”, u kojoj će se proizvoditi dijelovi za potrebe industrije automobila i strojeva. Navedena firma najveći dio svojih proizvoda plasira na njemačko tržište, a trenutno zapošljava 38 radnika, uglavnom mašinskih tehničara – CNC operatera. Kako su na svečanosti izjavile vlasnice kompanije, sestre Senada Bolcen i Tatjana Moralić, sa izgradnjom nove hale planirana je i nabavka novih strojeva, te zapošljavanje novih radnika.

**22. 5. 2017.**

**Predstava “Maratonci trče počasni krug” u režiji Mirele Trepanić i Dramske sekcije KUD „Adem Alić“ izvedena u BKC-u**

Rađena po tekstu čuvenog dramskog pisca Dušana Kovačevića iz 1972. godine, predstava je “društveno angažovana komedija, koja kritikuje društvo i njegove paradokse”. Pod pokroviteljstvom BKC-a i Općine Gračanica, predstavu je «iznijela» ekipa glumaca-amatera – članova dramske sekcije KUD “Adem Alić”: Miralem Džaferović, Nedžad Đuvić, Mirza Krtićić, Adnan Ahmetbegović, Esad Grbešić, Fahrudin Krtićić,

Semir Gopo, Nadina Džinić, Senada Brkić i Nedim Rešidbegović. “Tekst koji je napisan prije 45 godina kao da govori o današnjoj situaciji na Balkanu, ništa se nije promijenilo”, istaknula je režiserka Mirela Trepanić.

**23. 5. 2017.**

**Uz 15. godišnjicu postojanja i rada, firma “Tring” Gračanica predstavila prvi bosansko-hercegovački računar**

Radi se o proizvodu, nazvanom Craidd SOM, koji dolazi s predinstaliranim operativnim sistemom (Linux ili Android) i predviđenim kapacitetom za izvođenje većine automatizovanih zadataka, što ga čini optimalnim za automatizaciju, monitoring i kontrolu, kao i različite druge primjene u industriji. Riječ je o najmanjem računaru SOM tipa u svijetu, koji dolazi predinstaliran u fiskalne printere. U ovoj proizvodnji, „Tring“ je zauzeo poziciju vodećeg lidera na našem tržištu, a prezentaciju navedenog proizvoda, u velikoj sali BKC-a, na najbolji način obilježio 15. godišnjicu uspješnog rada.

**24. 5. 2017.**

**U okviru obilježavanja 25. maja – Dana odbrane općine Gračanica, održan Memorijalni marš “Zečev Gaj 2017”**



Organizator marša bio je Sportski savez u saradnji s Općinom Gračanica i srednjim školama, te boračkim organizacijama i udruženjima građana. U maršu je učestvovalo nekoliko stotina učenika Gimnazije “Dr.

Mustafa Kamarić” i Mješovite srednje škole Gračanica, kojima se priključilo i više zainteresiranih građana. Poslije polaganja cvijeća na Centralnom spomeniku Odbrambeno-oslobodilačkog rata 1992.-1995. i prigodnih obraćanja općinskih zvaničnika, kolona se preko Javora i Lendića zaputila prema Zečevom gaju, uzvišenju na tromedi Lendića, Malešića i Stjepan Polja, poprište borbi od 23.–25. maja 1992. godine, presudnih za odbranu Gračanice, u kojima su živote za Bosnu i Hercegovinu dala desetorica branilaca.

Na samom lokalitetu je, nakon polaganja cvijeća i učenja fatihe na šehidskom spomeniku, održan prigodan čas historije, na kome je govorio mr. sc. Rusmir Djedović, član redakcije «Gračaničkog glasnika» i jedan od sudionika tih historijskih događaja događaja, skupa sa dvojicom suboraca. Učesnicima su također podijeljeni i prigodni leci sa osnovnim historijskim podacima o tim događajima.

**24. 5. 2017.**

**Promocija 43. broja „Gračaničkog glasnika“ – tema broja „25. maj 1992 u Gračanici“**

Organizovana je u sklopu programa obilježavanja Dana odbrane i Dana općine Gračanica i u cjelini posvećena dramatičnim događajima koji su se zbili krajem maja 1992. godine na području Gračanice. Na promociji su govorili autori koji su se u ovom broju bavili tom tematikom: prof. dr. Omer Hamzić, mr. sc. Rusmir Djedović, pukovnik Ibrahim Nurkić, te Faruk Delić i Senahid Kahrmanović.

Sa promocije je odasлана poruka svim boračkim i drugim zainteresovanim organizacijama, institucijama i pojedincima da im je Redakcija spremna staviti na raspolaganje sve priloge o majskim danima 1992. godine koji mogu biti podloga za dalji rad na planu zapisivanja, prikupljanja podataka i istraživanja navedene historijske teme.

**25. 5. 2017.**

### **Izložba ratnih plakata i centralna manifestacija u povodu Dana odbrane općine Gračanica**

Nakon polaganja cvijeća, učenja fatihe i odavanja počasti na Centralnom spomen-obilježju Odbrambeno-oslobodičkog rata 1992.-1995. godine, u foajeu Bosanskog kulturnog centra je otvorena izložba ratnog plakata iz kolekcije Zavičajne muzejske zbirke Gračanica, o kojoj je govorio priređivač Edin Šaković (riječ je o originalnim primjercima plakata koje su sačuvali i BKC-u donirali Nijaz Omerović i Faruk Delić), a zatim je u velikoj sali održan tzv. "veliki čas historije", na kome je načelnik općine Nusret Helić pročitao prigodan referat, nakon čega je izveden prigodan kulturni program.

**27. 5. 2017.**

### **U Prijekom Brdu asfaltiran poligon za male sportove**

...koji se nalazi pored područne osnovne škole u ovom selu. Prethodno je izvršena njegova potpuna sanacija, zamijenjena je podloga (tampon) na čitavom terenu, površine 665 m<sup>2</sup>. Ukupna vrijednost projekta je preko 17.000 KM. Pored sredstava iz budžeta, svoj prilog su dali i građani.

**31. 5. 2017.**

### **Održana 8. sjednica Općinskog vijeća: usvojeno da Gračanica bude grad, spominjalo se i njeno povijesno ishodište, zaboravljena utvrda Soko**

Dok je većina vijećnika na ovoj sjednici, dižući ruku "za", bila u uvjerenju da Gračanica i formalno treba postati grad (pri čemu, po odluci, gradski okviri obuhvataju čitavo područje sadašnje općine), nekolicina njih je, ipak, iznijela mišljenje da je to čisti formalizam, čak i besmisleno, posebno ako se uzme u obzir da je lokalna vlast dopustila

da srednjovjekovni grad Soko već godinama propada, pa čak mu se, na sramotu vlasti, zbog neriješenih imovinsko-pravnih odnosa ne može ni prići. Da apsurd bude veći, prvi spomen grada Sokola u historijskim izvorima poslužio je i za određivanje datuma Dana općine, koji se od 2001. i službeno obilježava Bilo kako bilo, Općina Gračanica, voljom vijećnika i nakon završetka procedure na višim nivoima vlasti, imat će status grada (ma šta to značilo).

Osim spomenute odluke ("historijske", kako su je neki ocijenili), vijećnici su donijeli i odluku kome će dati priznanja za Dan općine, prihvativši ujedno i inicijativu za uspostavljanje trajne saradnje Općine Gračanica sa Opštinom Pljevlja u Crnoj Gori. Manje su interesantni bili izvještaji o radu i finansijskom poslovanju javnih preduzeća "Komus" (usvojen) i "Vodovod i kanalizacija" (vraćen na doradu). Izvještaji o radu Općinskog pravobranilaštva za 2016. godinu i o provedenim podsticajnim mjerama i njihovim efektima u poljoprivredi na području općine Gračanica su jednoglasno usvojeni.

**2. 6. 2017.**

### **Obilježen Dan općine Gračanica**

Svečanoj akademiji je prisustvovala i delegacija ambasade Francuske u Bosni i Hercegovini, na čelu sa Cathrine Palpant (atašeom za saradnju pri Ambasadi Republike Francuske u BiH), zatim ambasador Crne Gore Milan Lakić, predstavnici bratskog francuskog grada Fleury Les Aubrais, delegacija Općine Pljevlja iz Crne Gore, predstavnici Vlade TK i dr. U prigodnom referatu općinski načelnik Nusret Helić je govorio o značaju datuma 2. juna, sa historijskog aspekta (najavivši, ujedno, i vjerovatnu promjenu, odnosno korekciju datuma na 19. juni, kada zaista pada prvi spomen Sokola – o čemu je "Gračanički glasnik" već pisao), zatim o specifičnostima Gračanice, o mnogobrojnim urađenim projektima te o planovima za naredni period.

Kako je i uobičajeno, nakon referata uručena su i ovogodišnja općinska priznanja. *Zlatne plakete Općine Gračanica* dobile su firme "Trgovir" i "Radial", a zlatne značke Vehid Osmanović, Hamzalija Okanović i, posthumno, Mehmed Nurikić. *Počasni građanin općine Gračanica* postala je Marie Agnes Linguet, gradonačelnica francuskog grada Fleury Les Aubrais. Nakon svečane akademije, upriličeno je i svečano otvaranje nove Upravne zgrade "Komusa".

Od kulturnih događaja povodom Dana općine, u foajeu Bosanskog kulturnog centra građani su imali priliku pogledati izložbu slika polaznika škole slikanja, koju već drugu godinu zaredom organizuje akademski slikar Semir Osmanhodžić. Uoči Dana općine, u centru grada je organizovan koncert Eldina Huseinbegovića, uz vatromet.

### 8. 6. 2017.

#### **Kompanija „Širbegović“ ostaje lider građevinarstva u regionu.**

Prema pisanju portala "Biznis.info", ova je firma uspješno završila izgradnju nekoliko objekata u Hrvatskoj, Srbiji i Bosni i Hercegovini. Riječ je o montaži trgovačkog centra u Supetaru na Braču (površine 10.000 m<sup>2</sup>), montaži armirano-betonske konstrukcije na prodajnom objektu trgovinskog lanca "Plodine" u Ninu u Hrvatskoj (površine 2.300 m<sup>2</sup>), kao i konstrukciji na objektu u Ivanić Gradu (površine 6.500 m<sup>2</sup>). Firma uveliko radi i u Srbiji, a posljednji objekat koji je završila u tom području je "Retail park Lazarevac" (površine 9.000 m<sup>2</sup>). Prije toga, završila je izgradnju robne kuće "Ikea" u Beogradu (površine 35.000 m<sup>2</sup>). Od objekata u Bosni i Hercegovini završila je montažu AB konstrukcije na objektima B "Spring" Livno (površine 2.100 m<sup>2</sup>) i "Bravarija Pile" u Trnu (površine 1.000 m<sup>2</sup>), te započela montažu fabrike HST CNC Gračanica (površine 3.800 m<sup>2</sup>).

### 9. 6. 2017.

#### **Još jedna uspješna motorijada na Visu, kod Gračanice**

Počelo je tačno prije deset godina, kada je Moto klub "Lutalice" prvi put okupio dvadesetak bajkera iz nekoliko gradova Bosne i Hercegovine. Danas je to manifestacija koja privlači pažnju ne samo ljubitelja motocikala, već i običnih građana. Tokom dvodnevnog trajanja manifestacije organizatori priređuju za posjetioce razna takmičenja, obilje rock-svirke, bajkerskih igara itd. Po svemu, manifestacija postaje tradicionalna i već ima prepoznatljivu profilaciju.

### 7. 6. 2017.

#### **U 2016. godini Gračanica po razvijenosti 20. općina u Federaciji BiH**

Prema dokumentu "Socioekonomski pokazatelji po općinama u Federaciji BiH za 2016. godinu", kojeg je objavio Federalni zavod za programiranje razvoja, te proračunatog indeksa razvijenosti, izvršeno je rangiranje razvijenosti lokalnih zajednica u F BiH. Grupu od dvadeset najrazvijenijih općina po tim kriterijima čine sljedeće općine i gradovi: 1) Sarajevo – Centar, 2) Čitluk, 3) Ravno, 4) Novo Sarajevo, 5) Široki Brijeg, 6) Ilidža, 7) Posušje, 8) Žepče, 9) Grude, 10) Neum, 11) Vogošća, 12) Mostar, 13) Tešanj, 14) Sarajevo – Stari Grad, 15) Tuzla, 16) Novi Grad, 17) Vitez, 18) Hadžići, 19) Ljubuški, **20) Gračanica**, 21) Živinice, 22) Bihać itd.

### 29. 6. 2017.

#### **Održana 9. sjednica Općinskog vijeća: o stipendijama i gradskom parkingu**

Odluka o izmjenama i dopunama odluke o utvrđivanju uslova, kriterija i postupku djele stipendija učenicima srednjih škola i studentima usvojena je nakon rasprave, uz manje primjedbe (koje se odnose na učenike

generacije, odnosno pravo na stipendiju svih učenika sa područja općine Gračanica, bez obzira gdje su završili školovanje), a većinom glasova je usvojena i Odluka o broju i visini stipendija učenicima srednjih škola i studentima za školsku 2017./2018. godinu. Više pažnje vijećnika izazvale su i izmjene odluke o javnim parkiralištima na području Općine Gračanica (usvojene većinom glasova), po kojima će se naplata parkinga u gradu vršiti od 6.00 do 20.00 sati za period od 1. V. do 20. IX. i od 6.00 do 18.00 sati za period od 1. X. do 30. IV., dok će se subotom parking u užem dijelu grada naplaćivati od 6.00 do 13. sati.

Ostale tačke dnevnog reda (imenovanje članova Nadzornog odbora JP "Veterinarska stanica" Gračanica, Saglasnost na odluku o izmjenama statuta JP "Komus", informacija o aktuelnim privrednim kretanjima na općini i o stanju putne infrastrukture itd.) usvojene su bez veće rasprave i jednoglasno.

#### **04. 07. 2017.**

### **Uhapšeni članovi Uprave gračaničke "Fortune"**

U jutarnjim satima pripadnici MUP-a TK su izvršili pretraze na više lokacija u Gračanici, uključujući upravne prostorije Tvornice obuće "Fortuna", kao i paralelnih firmi "Fortex", "Fortob" i "Fortunatto", te neke privatne objekte. Privedeno je više osoba, među kojima i direktora "Fortune" Safeta Pjanića, dva člana Uprave, dva uposlenika i stečajnog upravnika Muhameda Hadžića. Navedene osobe su osumnjičene za veći broj krivičnih djela, počinjenih od početka 2009. do 2017. godine na području Gračanice i Tuzlanskog kantona, vezanih za organizovani kriminal, zloupotrebu službenog položaja i ovlaštenja, zloupotrebu ovlasti u privrednom poslovanju, nesavjestan rad u službi i krivotvorenje službene isprave. Na teret im se stavlja da su osnivali paralelna i vezana privredna društva s istom djelatnošću (proizvodnje obuće) kao i "Fortuna", čime su iskorištavali potencijale

i poslovne veze "Fortune", pri čemu su, kako navode mediji, pribavili višemilionsku protupravnu imovinsku korist, a "Fortuni" pričinili višemilionsku štetu.

Za neke od privedenih određen je pritvor, a pripadnici MUP-a TK će obaviti kriminalističku obradu i Tužilaštvu dostaviti izvještaj o počinjenom krivičnom djelu. O svemu će se, ipak, odrediti sud.

Inače, "Fortuna" je svojevremeno upošljavala oko 1.000 radnika, od kojih je dobar dio, vremenom raspoređen u firme "Fortex", "Fortunato" i "Fortob", odnosno u firme kojima je "Fortuna" izdavala prostor. Otvaranjem stečaja "Fortune", u radnom odnosu je zatečeno 215 radnika. Dio njih je prešao u pomenute firme, dok je dio ostao bez posla, ali i dijela zarađenih plata, kao i 19 godina neuplaćenog radnog staža. U narednim mjesecima, do trenutka zaključenja ovog broja, ova grupa bivših radnika je održala više protesta, blokirajući ulaz u firmu novoj stečajnoj upravi, a u par navrata i radnicima "Fortexa", "Fortunata" i "Fortoba".

#### **20. 07. 2017.**

### **Vlada Federacije BiH podržala inicijativu za donošenje Zakona o gradu Gračanica**

Na svojoj 112. sjednici, održanoj u Sarajevu, Federalna vlada je podržala inicijativu Općine Gračanica, te preporučila Predstavničkom domu Parlamenta Federacije usvajanje Zakona o Gradu Gračanica.

#### **07. 08. 2017.**

### **Izgrađena ljetna bina u Piskavici**

Pored prostora za kulturno-umjetničke sadržaje, u sklopu objekta su izgrađene svlačionice i mokri čvorovi, što je olakšalo održavanje sportskih i drugih društvenih aktivnosti u ovoj mjesnoj zajednici. Svečano otvorenje bine je održano 18. 08. na manifestaciji "Dani Piskavice". Izgradnju je vo-

dilo Udruženje građana “Jošak” Piskavica, u sklopu projekta “Jačanje uloge mjesnih zajednica u Bosni i Hercegovini”, kojeg zajednički finansiraju vlade Švicarske i Švedske, a sprovodi Razvojni program Ujedinjenih nacija (UNDP). Ovim projektom, inače, obuhvaćeno je šest mjesnih zajednica sa područja općine Gračanica.

**08. 08. 2017.**

### **Udruženje poslodavaca Gračanica doniralo Domu zdravlja Gračanica dva uređaja neophodna za rad Hitne medicinske pomoći**

Na inicijativu Službe hitne medicinske pomoći Doma zdravlja Gračanica, da joj se pomogne u nabavci dva defibrilatora, odazvalo se Udruženje poslodavaca općine Gračanica, koje je inicijativu podržalo na svom Upravnom odboru i uputilo odgovarajuće pozive svom članstvu. Gračanički privrednici su se u kratkom roku odazvali i prikupili sredstva. Tako su pomogli da se kupe dva spomenuta uređaja, pomoću kojih će ljekari i medicinsko osoblje u urgentnim situacijama imati mogućnost pratiti sve vitalne životne parametre bolesnika ili povrijeđenog. Služba hitne medicinske pomoći do sada je posjedovala svega jedan takav uređaj, a nabavkom nova dva (u ukupnoj vrijednosti od oko 40.000 KM) značajno će biti olakšan rad timovima hitne pomoći, jer omogućava da se u isto vrijeme uređaji koriste na različitim lokacijama na terenu, što znatno povećava šanse za preživljavanje životno ugroženih pacijenata.

**12. 08. 2017.**

### **Obilježena 23. godišnjica pobjede na Visu**

Obilježavanje je započelo u petak, 10. 08. 2017., prigodnim vjerskim programom, a nastavio se u toku vikenda, uz različite sportske, društvene i zabavne sadržaje na prostoru izletišta Vis. Centralna manifestacija je odr-



žana u ponedjeljak, na sam datum oslobođenja ovog nekada ozloglašenog agresorskog uporišta. Prigodnom programom ispred spomen-obilježja na Visu prisustvovala su porodice šehida i poginulih boraca, predstavnici Općine, ratni komandanti, predstavnici i članovi boračkih udruženja sa područja općine Gračanica, imami Medžlisa Islamske zajednice Gračanica, predstavnici političkih stranaka i nevladinog sektora. Program je započeo svečanim postrojanjem izviđača – članova izviđačkih odreda “Lukavica” i “Vrba” iz Doboj Istoka, učesnika marša “Stazama oslobodilaca Visa”, nakon čega je prigodno obraćanje imao općinski načelnik Nusret Helić. Prisutnima se obratio i glavni imam Medžlisa Islamske zajednice Gračanica Smajo ef, Mustafić, a u kulturno-vjerskom dijelu programa su sudjelovali i članovi udruženja mladih “Sijedi Krš”. Uslijedilo je polaganje cvijeća, a prisutnima su podijeljene i prigodne brošure sa historijskim podacima o oslobođanju Visa, koje su pripremili prof. Edin Šaković i pukovnik Ibrahim Nurkić, a izdala Općina Gračanica.

**13. 08. 2017.**

### **U Rašljevi svečano otvorena novosagrađena džamija**

...u prisustvu nekoliko hiljada vjernika, kao i uglednih gostiju–Reisu-l-uleme dr. Husein ef. Kavazovića, muftije tuzlanskog Vahid ef. Fazlovića, imama i rukovodstva Medžlisa IZ



Gračanica, načelnika općine, predstavnika Vlade i Skupštine TK, te Abdulatifa Al-Saeeda, predstavnika donatora iz Kuvajta. Kako je u svom izlaganju istaknuo predsjednik Građevinskog odbora Fikret Muslimović, general u penziji, rođeni Rašljevanin, izgradnja džamije je započela u proljeće 2015. godine, odlukom Džematskog odbora da se krene u poslove izgradnje i prikupljanje sredstava; znatno je ubrzana odlukom nasljednika **Šanage** Hadžiomerovića da u vakufe parcelu na kojoj je džamija sagrađena, te kasnijim uključenjem donatora iz Kuvajta, koji su osigurali najveći dio sredstava za izgradnju. Uključio se i velik broj drugih vakifa i donatora, koji su novcem, materijalom i uslugama podržali ovaj projekt, što je motiviralo građevinski odbor da uz džamiju sagradi i vakufsku zgradu sa stanom za imama, te prostorijama budućeg društveno-kulturnog centra. Svečanim činom otvorenja džamije i klanjanjem podne-namaza, ovi objekti su predati na korištenje džematu Rašljeve.

**18. 08. 2017.**

### “Ženski sajam – u susret turizmu”



...održan je u petak, od 9.00 do 18.00 sati u centru Gračanice, u šetališnoj zoni u ulici Alije Izetbegovića, kod parka. Organizator je bilo Udruženje «Mreža žena u biznisu» i Fondacija MI-BOSPO, u saradnji sa lokalnim udruženjima žena s područja Gračanice i sjeveroistočne Bosne, te uz podršku Općine Gračanica. Uz bogat kulturno-zabavni

program, na sajmu su učestvovala članice udruženja: “Stjepan Polje”, “Pribava”, “Donja Orahovica”, “Izvor” i “Behar” Škahovica, “Plodovi zemlje” Lukavica, kao i gošće iz Žepča, Zavidovića, Doboja, Tuzle, Sarajeva, Lukavca, Kalesije, Brčkog, Srebrenika, Tešnja, Laktaša, Bijeljine, Vlasenice i Gunje, koje su se uglavnom predstavile različitim tradicionalnim proizvodima i rukotvorinama. Cilj manifestacije je afirmacija poduzetništva koje vode žene nižih prihoda, a u okviru sajma, koji je privukao dosta pažnje građana, održane su i tri radionice

**21. – 24. 08. 2017.**

### Omladinski ljetni kamp na Visu



U organizaciji Vijeća mladih općine Gračanica i Asocijacije srednjoškolaca u BiH, na izletištu Vis je održan četverodnevni kamp pod nazivom “Youth summer camp” – drugu godinu zaredom.

Kao projekt tzv. neformalnog obrazovanja, kamp je okupio četrdesetak mladih iz nekoliko gradova Bosne i Hercegovine, koji su kroz različite radionice i edukativne aktivnosti radili na afirmaciji suživota i omladinskog aktivizma, te poduzetništva mladih, što je tema koja je u ovogodišnjem kampu posebno naglašena.

Pokrovitelj kampa je bila Općina Gračanica, a učesnike je posjetio i načelnik općine Nusret Helić, poručivši mladima: “Kroz dru-

ženje i upoznavanje, zajednički rad i aktivnosti, edukacije kroz koje prolazite i vašu viziju budućnosti pokažite da ova zemlja ima perspektivu i da može drugačije i bolje”.

Načelniku i drugim sponzorima zahvalnice su uručili predsjednik Vijeća mladih općine Gračanica Muharem Šehić i koordinator kampa Kerim Grbić.

### 23. 08. 2017. Turistička patrola TK posjetila Gračanicu



...obišavši neke od lokacija na području naše općine pogodne za razvoj turizma. Projekt “Turističke patrola” pokrenulo je Ministarstvo trgovine, turizma i saobraćaja Tuzlanskog kantona, u cilju otkrivanja turističkih vrijednosti, potencijala i resursa koje bi se u narednom periodu mogle iskoristiti ili unaprijediti. Projekt se realizira u saradnji sa relevantnim službama i osobama iz 13 općina ovog kantona.

U Gračanicu, goste je sa aktuelnim stanjem vezanim za oblast turizma upoznao Nihad Krajinović, predsjedavajući Općinskog vijeća, a “patrola” je posjetila Zavičajnu muzejsku zbirku, bosansku čardakliju u Varoši, izletišta Vis, te historijsko jezgro Soko, zatim gračaničku čaršiju, sa kulturno-historijskim spomenicima (Sahat-kula, Bijela džamija i Osman-kapetanova medresa), a posjeta je okončana na gračaničkim “Termama”, jednime od najznačajnijih turističkih resursa ne samo za općinu Gračanica, već i cjelokupan Tuzlanski kanton.

### 26. 08. 2017. Izložba Gordane Mehmedović: akvareli prepuni života

...postavljena je u Zavičajnoj muzejskoj zbirki i galeriji, a svečano otvorena u okviru manifestacije “Ljetne večeri pod lipama Gračanice”. Kako je na otvorenju istaknula dr. sc. Mevlida Đuvić, ovo je druga samostalna izložba Gordane Mehmedović u Gračanici, na određen način posebna, jer se autorica ovaj put predstavila isključivo kroz akvarele-pejzaže, portrete, vedute-slike “prepune života”.

### 29. 08. 2017. Primopredaja deminirane površine “Lendići – Brezici”

...izvršena je u prisustvu inspektora tuzlanskog ureda BH MAC-a, te predstavnika Općine i Civilne zaštite, kao i uposlenika Udruženja za eliminaciju mina (UEM), koji su izveli poslove deminiranja područja Lendići – Brezici. Projekt je finansirala Vlada Savezne Republike Njemačke, uz simbolično učešće Općine Gračanica, a ukupna vrijednost investicije iznosi blizu 87.000 KM. Deminiranjem ove lokacije stvoreno je sigurnije životno okruženje stanovnika Lendića i Stjepan Polja, te osigurani preduvjeti za korištenje deminiranog, uglavnom šumskog područja (sječa drveta, lov, izleti i sl.). Realizacijom ovog projekta ukupna deminirana površina na području općine Gračanica porasla je na 1.425.335 m<sup>2</sup>.

### 31. 08. 2017. Na 10. sjednici Općinskog vijeća: rasprave o statusu vodovoda na općini

Na početku sjednice, zakletvu je položio novi vijećnik: Muhamed Omerović iz “Naše stranke”, koji je u Vijeće ušao nakon podnošenja ostavke vijećnika Ismeta Nišića. Nakon zakletve, Vijeću su se obratili i predstavnici Inicijativnog odbora za zaštitu rijeke Spreče,

koji su zatražili veći angažman na zaštiti ovoga i svih drugih vodotoka. Pristupilo se potom usvajanju dnevnog reda i radu po jedinim tačkama.

Nešto više pažnje vijećnika privukla je prva tačka – izvještaj o izvršenju budžeta za prvu polovicu 2017. godine, kojeg je podnio općinski načelnik, istaknuvši da su ukupni ostvareni prihodi bili veći od planiranih za 10,95 %, što je utjecalo na suficit u iznosu od 1.550.000 KM. Izvještaj je usvojen većinom glasova, dok je izvještaj o utrošku budžetske rezerve za isti period usvojen jednoglasno, jednako kao i nekoliko odluka, rješenja i informacija.

No, u centru pažnje na ovoj sjednici Općinskog vijeća bila je *Informacija o stanju i statusu vodovoda u mjesnim zajednicama*, oko koje je otvorena duža rasprava – okončana zaključkom da nadležna služba, skupa s vijećima mjesnih zajednica uradi analizu stanja svih vodovoda po mjesnim zajednicama, kako bi se moglo planski pristupiti i po prioritetima rješavati vodosnabdijevanje na općini.

### 31. 08. 2017. Obilježen 1. septembar – Dan 111. gračaničke brigade



Zbog nastupajućeg najvećeg islamskog blagdana Kurban Bajrama, program obilježavanja je upriličen dan ranije (i nešto skromnije), uz Centralno spomen-obilježje Odbrambeno-oslobodilačkog rata. Nakon kraćeg obraćanja načelnika općine Nusreta Helića, na

ratni put 111./221. brdske brigade Gračanica je podsjetio Smajl Oštraković, ratni načelnik štaba brigade. Potom su delegacije općine, mjesne zajednice Gračanica i boračkih udruženja položile cvijeće na spomen-obilježje i odale počast šehidima i poginulim borcima.

### 10. 09. 2017. Manifestacija “Dani saveza lovačkih društava TK” održana na izletištu Vis kod Gračanice



Povod je bila proslava 22. godišnjice uspješnog djelovanja Saveza, koji broji 13 lovačkih društava sa područja Tuzlanskog kantona, a učešće je uzelo preko 1500 lovaca, uz velik broj gostiju i posjetilaca, privučenih atraktivnim programskim sadržajima.

Nakon svečanog defilea učesnika, gostima se u ulozu domaćina obratio Džemal Jukan, predsjednik Lovачkog društva “Srndač” iz Gračanice, a zatim i predsjednik Saveza Mensur Alić, koji je između ostalog istaknuo da Savez lovačkih društava TK broji oko 7000 članova i predstavlja najveći savez u Federaciji BiH. Manifestaciju je svečano otvorio Bego Gutić, predsjednik Vlade Tuzlanskog kantona – koja je bila i generalni pokrovitelj manifestacije. U svom je obraćanju istaknuo značaj lovaca u očuvanju prirode, okoliša i živog svijeta, ali i podsjetio na njihovu historijsku ulogu u odbrani Bosne i Hercegovine.

Lovci su potom priredili natjecanje u gađanju glinenih golubova, ocjeni kvaliteta lovačkih pasa, pripremi lovačkog kotlića i ocjeni lovačkih trofeja, uz muziku i zabavne sadržaje, te izložbe lovačke opreme i oružja.

13. 09. 2017.

### “Intelektualni dernek” u Gračanici: Naš doprinos u kreiranju makro-slike društva, nastup banjalučkog autora Srđana Puhala

Neformalna grupa “Pokret građana Gračanice” bila je organizator zanimljivog događaja pod gornjim nazivom, održanog u velikoj sali BKC-a Gračanica, u okviru kojeg je promovirana knjiga “Samo frontalno” banjalučkog autora Srđana Puhala, te upriličena javna debata u prisustvu većeg broja novinara, funkcionera, aktivista i drugih javnih djelatnika. Obraćanje Srđana Puhala, socijalnog psihologa i popularnog kolumniste, a ujedno i britkog društvenog analitičara, izazvalo je dosta interesovanja, jednako kao i rasprava poslije promocije, u kojoj se pokušalo dati kritički osvrt na stanje u lokalnoj društvenoj zajednici, ali i bosansko-hercegovačkom društvu u cjelini, te odgovoriti na pitanje povećavanja građanskog aktivizma u najširem smislu.

14. 09. 2017.

### Završetak projekta čišćenja i sanacije korita Lukavičke rijeke u Lukavici



...označen je skromnom svečanošću, kojoj su prisustvovali predstavnici organizacija *World Vision BiH*, kao glavnog finansijera projekta, zatim općine Gračanica, Civilne zaštite i MZ Lukavica. Očišćeno je i sanirano oko 150 m korita, na potezu kroz centar sela, a izvođač

radova je bila firma „Grimig“ iz Doboj Istoka. Projekt je, inače, implementiran u okviru poduzetih mjera na otklanjanju posljedica poplava i oporavku lokalnih zajednica u Bosni i Hercegovini, odnosno prevenciji od novih prirodnih katastrofa.

17. – 23. 09. 2017.

### “Evropska sedmica mobilnosti” nizom aktivnosti obilježena i u Gračanici.



Radi se o veoma popularnom događaju koji se duži niz godina tradicionalno održava na međunarodnom nivou, a cilj mu je promocija tzv. održivog transporta i promoviranje zdravog načina života. Ovogodišnja manifestacija održana je pod geslom “*Dijeljenjem postizemo više*”, a Općina Gračanica je jedna od rijetkih lokalnih zajednica u Bosni i Hercegovini koje su se uključile u projekt.

Početak obilježavanja je označio brdski biciklistički pohod “MTB kluba” Gračanica. Usljedila je aktivnost obdaništa “Naša djeca” iz Gračanice (šetnja kroz grad i poruke kojima su iskazali da žele čistu okolinu i veći oprez vozača), dok je Udruženje “EKO lideri” održalo edukaciju za učenike-srednjoškolce

na temu ““Eko-vožnja”. Provedena je i akcija “Na posao bez automobila”, u okviru koje su za građane osigurane besplatne autobuske linije na relaciji: Autobuska stanica – Korića Han – Jadrina – Fering – Etna – Hajdarevac, dok je sutradan u centru grada, u ul. Alije Izetbegovića, održana javna kampanja “22. septembar – Dan bez automobila”. Istoga dana, u foajeu BKC-a, postavljena je izložba učeničkih radova sa ovom tematikom, a najbolji i najkreativniji radovi su nagrađeni novčanim nagradama. Završne aktivnosti su održane u subotu, (23. 09. 2017.), kada je održan biciklistički defile kroz grad i takmičenje u vožnji bicikla za učenike osnovnih i srednjih škola na poligonu ispred osnovne škole “Hasan Kikić”.

**18. 09. 2017.**

**“Razgovor s povodom” u gračaničkoj biblioteci: uz 94. godišnjicu rođena Danka Grlića**



Istaknuti filozof i enciklopedist, univerzitet-ski profesor i pisac, Gračanlija po rođenju, Danko Grlić (1923.–1984.) spada u red najistaknutijih estetičara i filozofa na prostorima bivše države. U želji da u mjestu njegova rođenja probudi sjećanje na ovog znamenitog intelektualca i mislioca, Bosanski kulturni centar je u čitaonici Narodne biblioteke «Dr. Mustafa Kamarić» priredio manju prigodnu tribinu, na kojoj su o životu i djelu Danka Grlića govorili prof. Edin Šaković iz Gračanice i prof. Edi Bokun iz Tuzle.

**23.-24. 09. 2017.**

**U Gračanici održani jubilarni 50. dani bosansko-hercegovačke fotografije**



Riječ je o tradicionalnoj manifestaciji koju svake godine organizira Asocijacija za umjetničku fotografiju Bosne i Hercegovine (AUFBiH), a ove godine, jubilarne 50. susrete umjetničkih fotografa organizirao je nedavno osnovani Foto-klub Gračanica, kao najmlađa članica Asocijacije.

U dvodnevnom programu su učešće uzeli članovi i predstavnici klubova iz Banja Luke, Bijeljine, Doboja, Sarajeva, Travnika, Trebinja, Tuzle, Viteza i Zenice, kao i domaćine iz Gračanice.

U okviru programa, u deršani Osman-ka-petanove medrese je održano stručno predavanje o simbolici boje u umjetničkoj fotografiji, koje je održao Mirsad Mušanović (majstor fotografije AUFBiH), a zatim je promovirana fotomonografija “Retrospektiva” umjetničkog fotografa Murata Jašarevića iz Zenice (promotori su bili Ozren Božanović, predsjednik AUFBiH, i Hasan Puškar, predsjednik foto-kluba Gračanica). Održana je i svečana sjednica Asocijacije, na kojoj su dodijeljena umjetnička zvanja u fotografiji AUFBiH i FIAP (Međunarodnog saveza umjetničke fotografije).

Za učesnike najzanimljiviji dio programa bila je „ulična fotografija u Gračanici“, te dvodnevni foto-safari, u okviru kojeg su upriličene posjete naselju Sokol i njegovom historijskom jezgru, te naselju Zolje u mje-

snoj zajednici Lukavici, skoro potpuno napuštenom zaseoku u kome kao da je “vrijeme stalo” prije nekih pola stoljeća i više.

U okviru programa postavljene su i svečano otvorene dvije izložbe fotografija. Na izložbi u foajeu BKC-a predstavili su se mladi članovi foto-klubova Asocijacije (do 21 godine), dok je u prostorijama Zavičajne muzejske zbirke i galerije postavljena izložba bosanskohercegovačke fotografije “FotoBiH 2017”.

Učesnici manifestacije otišli su iz Gračanice sa pozitivnim utiscima, izražavajući zadovoljstvo kvalitetnom organizacijom i gostoprimstvom na koje su nailazili, te iskazujući priznanje Foto-klubu Gračanica kao svom domaćinu.

**27. 09. 2017.**

### **Svečano otvorenje novog tržnog centra “ETNA”**



Realizacijom investicije u vrijednosti od blizu 5 miliona KM, postojeći tržni centar je proširen za oko 12.000 m<sup>2</sup> prostora, u kojem je sa radom započeo veći broj butika i prodavnica (uglavnom iz poznatih stranih trgovačkih i modnih lanaca), a znatno je proširena i ugostiteljska ponuda. Svečanom otvorenju, s brojnim zabavnim i promotivnim sadržajima (uključujući koncert Mirze Selimovića) prisustvovao je veliki broj građana, kako s područja Gračanice, tako i šire okoline. Proširenjem tržnog centra “Etna”, gračanička firma “Edoslad” je pružila priliku za posao velikom broju novih radnika, a ujedno još jednom

pokazala svoju uspješnost i dobru poslovnu politiku. Inače, u blizini tržnog centra u izgradnji je i proizvodni pogon ove firme, u kojem će također biti otvoren veći broj novih radnih mjesta.

**28. 09. 2017.**

### **Sa 11. sjednice Općinskog vijeća: neuspjelo izglasavanje odluke o izmjenama Statuta**

Sjednicu je otvorio građanin Šemsudin Hiđić, ukazujući na problem pristupa do svoje kuće, do koje zbog poplava 2014. godine već više od tri godine nema pristupnog puta. Predstavnici UNDP-a su predstavili projekt lokalnog okolišnog i ekonomskog upravljanja MEG-UNDP; po riječima koordinatora Siniše Ubiparipovića iz UNDP-a, značajan dio projekta odnosi se na pomoć u funkcionisanju lokalnih samouprava.

Odluka o pristupanju izmjenama i dopunama Statuta općine izazvala je najviše rasprava. Klub vijećnika SDP-a je tražio da se rok za izradu nacrtu, umjesto propisanih 60 poveću na 120 dana, što nije podržano, tako da ni glasanje o konačnoj odluci nije rezultiralo podrškom, potrebnom za njeno izglasavanje. Posljedica toga je da se u narednih pola godine neće moći raspravljati o inače nužno potrebnim izmjenama statuta općine.

Važnija tačka dnevnog reda bila je i utvrđivanje javnog interesa za zemljište duž regionalne ceste Donja Orahovica – Falešići – Srebrenik, što je preduvjet za njegov otkup, odnosno rekonstrukciju i proširenje. Dosta pažnje je izazvala i “Informacija o stanju i statusu nepokretne imovine u Mjesnim zajednicama (broj objekata izdatih pod zakup, godišnji prihod od zakupa i utrošak tih sredstava)”, o kojoj je vođena dosta duga rasprava. Na kraju, Informacija nije dobila podršku vijećnika, koji su zaključili da je potrebno da sve mjesne zajednice što prije uknjiže svoju imovinu, te da načelnik općine formira stručne komisije koje će izvršiti pro-

cjenu vrijednosti nekretnina u svim mjesnim zajednicama.

Vijećnici su također podržali i više izvještaja i informacija, koje su usvojene uglavnom bez veće rasprave i jednoglasno.

**28. 09. 2017.**

### **Učesnici 30. međunarodnog savjetovanja "Arhivska praksa" posjetili Gračanicu**

Domaćin je bio Bosanski kulturni centar, a gosti su, po dolasku iz Tuzle (gdje se savjetovanje održava), prošetali gradom, obiđavši kulturno-historijske spomenike, nakon čega je u deršani Osman-kapetanove medrese upriličena prigodna prezentacija o Gračanici. Nakon toga, pogledali su izložbu umjetničke fotografije "FotoBiH 2017" u Zavičajnoj muzejskoj zbirci, te se uputili do Stare bosanske kuće u Varoši, gdje su ih ugostile članice Udruženja "Gračaničko keranje".

**29. 09. 2017.**

### **Svečana primopredaja stambenih zgrada za romske socijalno-ugrožene porodice u naselju Javor**



...upriličena je uz veliki broj gostiju i zvaničnika iz Sarajeva, Tuzle i Gračanice, te predstavnika romskih asocijacija i udruga. Izgrađene su dvije stambene zgrade, sa ukupno 12 stambenih jedinica, u kojima će biti zbrinuto oko 60 pripadnika romske populacije. Radi se uglavnom o Romima koji su živjeli u ka-

tastrofalnim uvjetima na području deponije smeća Grabovac.

Realizacija projekta je trajala godinu dana, a finansijski okvir je osiguran sredstvima Evropske unije (600.000 KM), Federalnog ministarstva raseljenih lica i izbjeglica (100.000 KM) i općine Gračanica (20.000 KM iz budžetskih sredstava, uz besplatno zemljište za izgradnju i sve potrebne dozvole sa priključcima na infrastrukturu).

**05. 10. 2017.**

### **Promocija knjige "Čuvarkuća" autora Tarika Đodića**

...održana je u velikoj sali BKC-a, pred više od tri stotine prisutnih, što je za ovakve kulturne događaje gotovo nevjerovatan broj. Promotori su bili: akademik Abdulah Sidran, Goran Milić i Ademir Kenović, a u programu su učestvovali i Armin Muzaferija, te Ibrahim Jukan, koji su prisutne počastili prigodnim pjesmama, te Adnan Rončić kao moderator. Obratio se i sam autor, Prnjavorčanin po rođenju, inače i rodbinski vezan za Gračanicu—što je jasno čitateljima "Čuvarkuće", knjige kratkih priča i autobiografskih zapisa, nastalih iz prvobitnih statusa na Facebooku, koji su već i tada privukli veliku pažnju publike. Sama knjiga je, od svog prvog izlaska (potkraj 2016. godine, u nakladi sarajevskog "Buybooka"), već doživjela četiri izdanja, a promocije, koje se u proteklih godinu dana organiziraju u bosansko-hercegovačkim gradovima, masovno su posjećene i gotovo da predstavljaju svojevrsan fenomen.

**13. 10. 2017.**

### **Primopredaja nove deminirane površine: "Malešići – Javor 1"**

I ovaj projekt je finansirala Vlada Savezne Republike Njemačke, uz saradnju sa Norveškom narodnom pomoći, a radilo se o projektu I kategorije sa liste prioriteta za područje Općine Gračanica u 2017. godini.



Ukupna površina deminiranog područja iznosi 60.500 m.<sup>2</sup> Radove su izvodili timovi Norveške narodne pomoći, a primopredaja deminirane površine izvršena je u prisustvu predstavnika BH MAC-a, Službe za civilnu zaštitu Općine Gračanica i MZ Malešići.

**13. 10 2017.**

### **Izložba fotografija i susret “Sevdalije - moji prijatelji” Hasana Berberovića**

Radi se o privatnoj kolekciji fotografija Hasana Berberovića, nekadašnjeg glavnog inženjera i tehničkog direktora gračaničke “Jadrine”, istaknutog društveno-političkog rukovodioca, a prije svega velikog zaljubljenika u sevdah, pjesmu i veselje, koje je godinama sakupljao kroz druženja i susrete sa poznatim sevdalijama, pjevačima i muzičarima sa bosansko-hercegovačke estradne scene. U želji da te, fotografijom ovjekovječene, uspomene podijeli sa svojim prijateljima i sugrađanima, Hasan je priredio izložbu popraćenu prigodnim muzičkim programom u kojem su nastupili i poznati interpretatori sevdaha iz Tuzle, Zekija Suman i Arif Ahmetašević (svaki na svoj način, porodično vezani za Gračanicu), uz Abaza Bijedića na harmonici i druge goste. Program, koj je pobudio veliko interesovanje publike, vodila je Erda Redžepagić, urednica sa RTV TK

**14. 10. 2017.**

### **Predavanje generala Dudakovića u džematu Donja Orahovica**

U organizaciji Džematskog odbora Donja Orahovica, u prostorijama Džamije Centar, održano je predavanje generala Armije R BiH Atifa Dudakovića, proslavljenog komandanta Petog korpusa i heroja. Pred oko 300 prisutnih, general Dudaković je govorio o kontinuitetu borbe za državnost Bosne i Hercegovine, a poslije predavanja, skupa sa kolegama-generalima Fikretom Muslimovićem i Salihom Malkićem, nastavio je druženje sa džematlijama. Bilo je to, inače, jedno u nizu prigodnih predavanja koja se redovno organiziraju (dva puta mjesečno) u Džamiji Centar u Donjoj Orahovici.

**30. 10. 2017.**

### **12. sjednica Općinskog vijeća: usvojeni rebalans budžeta za 2017. i nacrt budžeta za 2018. godinu**

Prema riječima načelnika općine Nusreta Helića, rebalans je rezultat dosadašnje realizacije budžeta, procjene kretanja prihoda i rashoda do kraja godine, ukazanih potreba za novim projektima, doznačenih namjenskih sredstava viših nivoa vlasti itd., te da je veći budžet u odnosu na plan rezultat većih planiranih prihoda, te potpora i grantova. Od ukupno 1.248.084 KM, koliko je veći budžet po rebalansu, u kapitalne izdatke je usmjereno 987.677 KM a u tekuće izdatke 260.407 KM. Odluka o rebalansu budžeta je usvojena uz svega 4 suzdržana glasa. Nacrt budžeta je uz kraću raspravu jednoglasno usvojen.

Osim ove dvije tačke dnevnog reda, koje su, razumljivo, privukle najviše pažnje vijećnika, usvojeno je još nekoliko dokumenata – uglavnom jednoglasno.